



KENYATAAN AKHBAR OLEH KETUA AUDIT NEGARA

BERKENAAN:

LAPORAN KETUA AUDIT NEGARA MENGENAI PENYATA KEWANGAN KERAJAAN NEGERI SEMBILAN DAN PRESTASI KEWANGAN AGENSI NEGERI TAHUN 2018

1. Pengauditan Penyata Kewangan Kerajaan Negeri dilaksanakan selaras dengan Seksyen 5(1)(a) Akta Audit 1957 yang menghendaki Ketua Audit Negara mengaudit akaun persekutuan dan negeri. Perkara 107 (1) Perlembagaan Persekutuan menghendaki Ketua Audit Negara mengemukakan laporannya kepada Yang di-Pertuan Agong yang hendaklah menyebabkan laporan itu dibentangkan di hadapan Dewan Rakyat. Perkara 107 (2) pula menyebut mana-mana laporan yang berhubungan dengan sesuatu negeri hendaklah dikemukakan kepada Raja atau Yang di-Pertua Negeri bagi negeri itu untuk dibentangkan di hadapan Dewan Undangan Negeri.
2. LKAN Mengenai Penyata Kewangan Kerajaan Negeri Sembilan dan Prestasi Kewangan Agensi Negeri Tahun 2018 telah dibentangkan di Dewan Rakyat pada 4 November 2019, setelah diperkenankan oleh Kebawah Duli Yang Maha Mulia Seri Paduka Baginda Yang di-Pertuan Agong. Seterusnya LKAN telah mendapat perkenan Duli Yang Maha Mulia Yang di-Pertuan Besar Negeri Sembilan untuk dibentangkan di Dewan Undangan Negeri pada 22 November 2019.
3. LKAN pada kali ini antara lainnya mengandungi perkara-perkara penting seperti berikut:

3.1. Pengesahan Penyata Kewangan Kerajaan Negeri

Pengauditan terhadap Penyata Kewangan Kerajaan Negeri Sembilan Bagi Tahun Berakhir 31 Disember 2018 adalah untuk memberi pendapat sama

ada penyata tersebut menunjukkan kedudukan kewangan yang benar dan saksama serta rekod perakaunan yang berkaitan telah diselenggarakan dengan teratur dan kemas kini. Pengauditan yang dijalankan mendapati penyata kewangan kerajaan negeri telah diberi Pendapat Tanpa Teguran. Penyata kewangan tersebut menunjukkan gambaran yang benar dan saksama tentang kedudukan kewangan kerajaan negeri dan rekod perakaunan telah diselenggarakan dengan teratur dan kemas kini.

3.2. Analisis Kewangan Kerajaan Negeri

- a. Jabatan Audit Negara di samping mengesahkan penyata kewangan kerajaan negeri, juga membuat analisis terhadap kedudukan kewangan kerajaan negeri.
- b. Analisis Audit berdasarkan kepada Penyata Kedudukan Kewangan, Penyata Penerimaan dan Pembayaran Wang Tunai, Penyata Prestasi Kewangan, Penyata Akaun Memorandum dan Nota Kepada Penyata Kewangan, mendapati kedudukan kewangan kerajaan negeri adalah stabil.
- c. Secara keseluruhannya, baki terkumpul Kumpulan Wang Disatukan pada akhir tahun 2018 adalah RM687.76 juta, menurun sejumlah RM38.20 juta berbanding RM725.96 juta pada akhir tahun 2017.
- d. Akaun Hasil Disatukan mencatatkan lebih semasa sejumlah RM26.45 juta, meningkat sebanyak RM0.14 juta berbanding RM26.31 juta pada tahun 2017. Dengan ini, baki Akaun Hasil Disatukan pada akhir tahun 2018 berjumlah RM369.30 juta, berbanding RM342.85 juta pada akhir tahun 2017.
- e. Jumlah hutang awam menurun sebanyak RM0.78 juta menjadi RM936.76 juta berbanding RM937.54 juta pada tahun 2017. Tunggakan bayaran balik hutang awam oleh kerajaan negeri pada tahun 2018 ialah RM276.48 juta.

3.3. Penyerahan, Pengesahan, Pembentangan Penyata Kewangan dan Prestasi Kewangan Agensi Negeri

- a. Seksyen 5(1)(c) Akta Audit 1957, menghendaki Ketua Audit Negara mengaudit Penyata Kewangan Agensi Negeri iaitu Badan Berkanun Negeri (BBN), Pihak Berkuasa Tempatan (PBT) dan Majlis Agama Islam (MAI). Objektif pengauditan adalah untuk memberikan pendapat terhadap penyata kewangan agensi negeri sama ada penyata ini menggambarkan kedudukan yang benar dan saksama serta rekod perakaunan yang berkaitan telah diselenggarakan dengan teratur dan kemas kini.
 - b. Setakat 30 Ogos 2019, Jabatan Audit Negara telah mengesahkan 10 daripada 14 penyata kewangan bagi tahun berakhir 31 Disember 2018, iaitu lima (5) penyata kewangan BBN dan lima (5) penyata kewangan PBT. Empat (4) penyata kewangan BBN dan lima (5) penyata kewangan PBT telah diberikan Pendapat Tanpa Teguran manakala satu (1) penyata kewangan BBN telah diberikan Pendapat Berteguran.
 - c. satu (1) penyata kewangan iaitu Yayasan Negeri Sembilan dikeluarkan Sijil Audit Berteguran disebabkan sejumlah RM10.40 juta penghutang perdagangan dan penghutang lain Kumpulan pada 31 Disember 2018 tidak dapat disahkan kerana tiada dokumen sokongan.
4. Laporan Ketua Audit Negara Mengenai Penyata Kewangan Kerajaan Negeri dan Prestasi Kewangan Agensi Negeri Sembilan Tahun 2018 akan dimuat naik di laman web Jabatan Audit Negara. Orang awam boleh melayarinya di alamat <http://www.audit.gov.my> selepas pembentangan di Dewan Undangan Negeri pada 22 November 2019 mulai jam 9.30 pagi. Sebarang pertanyaan lanjut/pandangan mengenai Laporan tersebut bolehlah dialamatkan kepada [Warkah untuk Ketua Audit Negara](#).

Ketua Audit Negara
Malaysia

22 November 2019